

Baha itsamatakabi, matonehe piahawa pataxaetabikuhinae patanahuaxaewi baha ponarüküpa. Nexatha baha akueyabi pahiwiyonübehe saya baha paenenahü pataxaemesatha. Ahena ponatabihitsianü, nehumaitsi nexatha Wowaiwa :

- Hernando! nehai.

- Hoi! hanü.

- Ika xua panihahumekuene, panihakuene. Xua baha panakuenebamebehe, abüxü baha pakatosahinabehe? nehai.

- Haha! hanü.

- A! hai. Ayaihawa saya?

- Itsa bo! Abüxü metha! Itsiatha metha bekaesemananexa nakopatsipa belia bo! Xanü abüxü bitso apoyapütaenü! hanü baitsi saya baha.

- He! hai baha.

Nexatha baharaxua kuhinae, baharapowa baha, Wowaiwa :

- Xua saya panakuenebamebehe, bepeabehe, bepiaithothia saya! Baitsi apobeliwaisikuene. Baha saya bepetsikehemahawayo saya baha! Saya baitsi pihakuatha bepepitsapae. Xanü xua aponetsitaxanepanae! Saya baha netsitaabehe, baharaxua. Saya xaniawaetsia apopaebi baharapaliwaisianü! Saya nehumaitsi baharapitsixae, ponü pakabarünakueneba saya nehumaitsi imatha pikani hotareka pina hota pina Santa Ritahawathareka, baha pina ponü hera baha pina itsi! Wetsika ponü itaropitahe. Baha pina ponü petopanü, tulupu pina naexana, baharaponü nehai raha! Itsiatha ponükuene apowünüyapütaenü! Nakophünütahü baha! hai baharapowa Wowaiwa.

- A! hanü nexatha. Baharahumaitsi? hanü.

- Aha! Baharanehumaitsi! Saya xua itsi, baharaxua netsitaabehe! Tsipahi xanü baharapaliwaisianü itsa humetanihi, nexatha saya humatabüitsinü. Baha hane akuenebi bo! Xanü hane akuenebi wakaratha naexanaehitsipahü. ophaebütha naexanaehitsipahü! Baha xuanü. De pakuenetha tsipae piha?! Baharapaliwaisianü saya wüxua saya kasäü, mabepakuene tsaponaeukuene saya baha. De pakuenia piha! Netsitaabehe saya baharaxua! hai baitsi Wowaiwa.

- Haha! Xaniahamü metha bo! hanü saya baha.

- Itsiatha saya itsi kahena baha! baharahota humaitsinü. Xamü baitsi pikani humaitsimü! Xamü baitsi! Baitsi itsiatha xanü baharapakuenia baha tanewitsatsiwi, baharaxua panemuxunawitsata, yamuxunawitsabahü baha! Netsipaeba tahamonae. Peruhuwi baha peliwaisi tsaponae. Werena baha, werena baha petsipaebiwi tsaponae. Nexatha xanü baharaxua baha tsaro! Pihinia pakuenia napaebahü saya tsahane baharaxua, penatsipaebikuenia hane, nahaetaruka. Xaniahaikuene baha nexatha apoyapütae. Baha itsiatha patahawaxae baha, patahaliwaisixae. paxanü nexatha baharapaliwaisi paasiwanü! Pakuenetha xamü nihakuene asiwamü, nihaliwaisi asiwamü baha, pekatokenetsiataehawa nihaliwaisi apohitsipaemü! Tsipahi nihawa, tsipahi yaiyataneme. Tsipahi namatamotsiaexaname nihaliwaisi, nihakuene. Baharapihinia pakuenetha paxanü, patahakuene panamatamotsiaexanahü baha. Tsipahi baharaxua patahawa baha. Baharapaliwaisianü payahawanaexanahü, tahamonae baharaxua yahawanaexana! Nexatha baha xuatha humaitsinü! Humaitsinü baha!

- E! Hume raha! Tsipahi baitsi baha kaenü Dio itsi baha! nehai.

- A! Baharabaitsi pikani itsi baha! Xamü baitsi nihahumetha Dios! Xanü baitsi tahumetha Kuwainü baha.

- De itsi nexatha Kuwainü?

- Baitsi Kuwainü daxitakuene exana. Kopiaya pina xua aitakiri tsanukae, nexatha pina baharaponü baha Kuwai Matsuludani pina baharahota pina naexana baha, pihakuatha saya naexana. Baha pina hota yamatakabianaexana. Xuatha pina nexatha wahakatae hane merawi, wahakatae hane matakabi. Baha pina ponü pehumatabükuene.